

Headlines

- भारत दी प्रधानता च 18मां ब्रिक्स सम्मेलन नमीं दिल्ली च रम्भ होआ। प्रधानमंत्री नरेन्द्र मोदी होरें आखेआ जे भारत दी ब्रिक्स प्रधानता लोकें पर केन्द्रित ते मानवता प्रथम आहले नज़रिये पर अधारित ऐ
- NIA नै लश्कर-ए-तैयबा कन्नै जुड़े दे बन्ने पार आतंकी साजिशें आहलें मामले च जम्मू-कश्मीर च 10 थाहरें पर तपाशी अभियान चलाया।
- सुरक्षाबलें डोडा च इक्क सांझे अभियान दौरान पहले मारे गेदे पाकिस्तानी आतंकी संगठन जैशे-मोहम्मद कन्नै जुड़े दे इक्क आतंकवादी दी लोथ गी बरामद कीता।
- जम्मू-कश्मीर च त्रीऽ राष्ट्री लोक अदालत दा सरिस्ता कीता गेआ। एदा मकसद लड़ाई-झगड़े आहले मामले गी तौले ते आपसी सहमति कन्नै सुलझाना हा।
- ते मौसम विभाग नै कलै थमां 16 सितम्बर तगगर जम्मू-कश्मीर च टामियें-टामियें थाहरें पर हलकी बरखा ते गर्जी-गर्जी कन्नै बरखा दियें फुहारें दी पेशनगोई कीती ऐ।

<><><><><><>

BRICS Summit (Byte)

भारत दी अध्यक्षता च 18मां ब्रिक्स सम्मेलन अज्ज नमीं दिल्ली च रम्भ होआ। प्रधानमंत्री मोदी होरें तमिलनाडू दे रामेश्वरम च मशहूर रामनाथ स्वामी मंदर दी पृष्ठभूमि च भारत मंडपम च दुनिया दे लीडरें दा सोआगत कीता। दंडु दिने तगगर चलने आहले इस बड़े कार्यक्रम च 11 मिम्बर देस ते 10 भ्याल देस किट्टे होए दे ना।

सम्मेलन दौरान वैश्विक शासन बवस्था, बहुपक्षवाद बपार ते निवेश, प्रोद्योगिकी खाद्य ते ऊर्जा सुरक्षा, सेहत सेवा, आपदा प्रबंधन ते होर दुए महत्वे आहले मुद्दें पर बचार बमर्श होने दी मेद ऐ। ए सम्मेलन भारत दी 2026 ब्रिक्स प्रधानता तैहत होआ करदा ऐ, जेदा सिरलेख ऐ बिल्डिंग फॉर रेजिलिएंस Innovation Co-Operation & Sustainability. सम्मेलन दे शुरुआती सत्र गी सम्बोधित करदे होई प्रधानमंत्री नरेन्द्र मोदी होरें आखेआ.....(बाईट)

<><><><><><>

NIA Raids

राष्ट्री जांच एजेंसी NIA नै अज्ज जम्मू-कश्मीर च 10 थाहरें पर चानचक्क तपाशी अभियान चलाया। ए कारवाई पाकिस्तान दे हैंडलर्स ते मकामी Over Ground Worker दे नैटवर्क कन्नै जुड़ी दी बन्ने पार थमां चलाए जाने आहली आतंकी साजिशें दे सरबंध्य च कीती गेई। NIA दियें टीमें श्रीनगर, कुपवाड़ा, अनंतनाग, पुलवामा ते बडगाम च तपाशी अभियान चलाया। ए जांच 31 मार्च गी लश्कर-ए-तैयबा कन्नै जुड़े दे इक्क कथित OGW दी गिरफ्तारी मगरा होआ करदी ऐ। ध्यानजोग ऐ जे इस ओवर ग्राउंड वर्कर कोला इक्क हथ गोला ते होर दुआ गोला बरुद बरामद कीता गेआ हा। एजेंसी बरीकी कन्नै मामले दी पड़ताल करा'रदी ऐ।

<><><><><><>

SIA Poonch Raids

राज्य जांच एजेंसी NIA नै अज्ज पुंछ जिले दे मंडी ते सूरनकोट इलाके च बक्ख-बक्ख थाहरें पर तपाशी अभियान चलाया। साढ़े जिला संवाददाता नै खबर दिती ऐ जे पुलिस मुजब SIA दियें टीमें दंडु जनें दे घरें दी तलाशी लैती, जिंदे च इक्क मंडी दे चीला ढांगरी इलाके ते दुआ सूरनकोट तहलील च हा। ए तपाशी अभियान चला'रदी जांच दे इक्क हिस्से तैहत लैती गेई। अधिकारियें अजें तगगर इस मामले जां तपाशी दे मकसद दी जानकारी नेंई दिती ऐ।

<><><><><><>

Terrorist Body Recovered

सुरक्षा बलें पाकिस्तानी आतंकी संगठन जैश-ए-मोहम्मद दे इक्क आतंकवादी दी लोथ बरामद कीती ऐ, जिसी डोडा जिले च इक्क पैहले चलाए गेदे इक सांझे अभियान दौरान मारी मकाया गेआ हा। जम्मू-कश्मीर पुलिस ने इक्क सोशल मीडिया पोस्ट च दस्सेआ जे ए बरामद'गी सरबंधी अभियान स्पेशल आप्रेशन ग्रुप डोडा, राश्ट्री राइफल्स ते केन्द्री रिज़र्व पुलिस बल आसेया चलाया गेआ। अधिकारियें दस्सेआ जे इस अभियान दौरान आतंकवादी दी लोथ बरामद कीती गेई। कुसै थाहरै थमां रातीं नेरे च दस्सने आहली M4 रफल बी थोई ऐ। सुरक्षा बल इलाके च निगरानी ते सुरक्षा बढ़ाने दे मकसद कन्नै अभियान जारी रखा रदे ना।

<><><><><><>

Flyover Rxns (Byte)

जम्मू दे लोकें सरकार दे प्रस्तावित बख्शी नगर फ्लाई-ओवर बनाने दे फैसले दा सोआगत कीता ऐ। उ'नें आखेआ जे एदे बनने कन्नै बार-बार लगने आहले ट्रैफिक जाम थमां बड़ी मती राहत थोहगा। साढ़े जिला संवाददाता नै दस्सेआ जे जम्मू-कश्मीर मंत्रिमंडल नै इस परियोजना गी मंजूरी देई दिती ऐ। एदे पर तकरीबन 386.83 करोड़ रुपये दा खर्च औगा।

1.995 किलोमीटर दा एलिवेटड लांघा जम्मू अखनूर रोड पर मौजूदा मुट्ठी फ्लाई-ओवर गी शकुंतला थिएटर कश बी.सी. रोड कन्नै जोड़गा। एदे पर बख्शी नगर मार्किट ते महेशपुरा रोड्दरी शामिल ना। ए परियोजना फंड ते कानूनी मंजूरी थोहने पर पंज बरे दौरान बक्ख-बक्ख चरणे च पूरा कीता जागा। आकाशवाणी समाचार कन्नै गल्ल करदे होई किश मकामी लोकें आखेआ.....(बाईट)

<><><><><><>

3rd National Lok Adalat (Byte)

इस बरे दी त्री राश्ट्री लोक अदालत अज्ज समूलचे जम्मू-कश्मीर च लोआई गेई जेदे कन्नै लोकें गी अपने तनाजें दा तौले ते रमानदारी कन्नै नबेडा करोआने दा मौका थोआ। श्रीनगर च जम्मू-कश्मीर ते लद्दाख हाई कोर्ट दे मुख् न्यायधीश जस्टिस पुष्पेन्द्र सिंह भाटी होरें इस कार्यक्रम दी शुरुआत कीती ते कनून दे दायरे च गल्लबात राए मुद्दे गी हल करने पर जोर पाया। जम्मू च तकरीबन 750 मामलें दा नबेडा कीता गेआ, जिंदे च तकरीबन 9 करोड़ रुपये मोटर एक्सीडेंट क्लेम ट्रिब्यूनल मामलें च दिते गो। उधमपुर च त्रंऊ बैंके बैंक दोआर, वैवाहिक ते सिविल मामलें दा नबेडा कीता। इस मौके पर बोलदे होई मुख् न्यायधीश पुष्पेन्द्र सिंह भाटी होरें आखेआ.....(बाईट)

<><><><><><>

Udhampur Job Fair (Byte)

उधमपुर च जिला रोजगार ते परामर्श केन्द्र सत्र दा त्रिया रोजगार मेला लोआया गेआ जिसी जिले भरै दे पढ़े-लिखे दे नौजवानें थमां उत्साहवर्धक प्रतिक्रिया थोई ऐ। ग्रामीण ते शैहरी दौनें खेतरें थमां तकरीबन 150 असामियें आस्तै केई नौजवानें इस मेले च हिस्सा लैता ते 10 निजी कम्पियें एहदे च नौकरी दे मौके दिते। इस मौके पर बड़ी बड्डी तादाद च मेदवारें इंटरव्यू दिते ते जेहड़े योग्य हे उनें'गी बक्ख-बक्ख नौकरियें लेई चुनेआ गेआ। रोजगार मैहकमे दे उप-निदेशक संजीव कुमार होरें आखेआ जे इस कार्यक्रम दा मकसद उधमपुर दे पढ़े-लिखे नौजवानें गी निजी क्षेत्र दिएं नौकरियें कन्नै जोड़ना ऐ। उ'नें इब्बी दस्सेआ जे भविक्ख च होर बी रोजगार मेले आयोजित कीते जागंन ते रोजगार दे विकल्प बधाने आस्तै होर बी कम्पनियें गी साहा दिता जागा। आकाशवाणी समाचार कन्नै गल्लबात करदे उ'नें आखेआ.....(बाईट)

तोंआई, नौकरी दी मेद लेइयै मेले च आइदी इकत कुडी काजल शर्मा नै आखेआ.....(बाईट)

<><><><><><>

Prog. Announcement

आकाशवाणी जम्मू दा क्षेत्रीय समाचार एकांश सोमवारें 14 सितम्बर गी दपैहरी 2.30 बजे “हिंदी दिवस” दे मौके पर 30एं मिन्टें दा इक विशेष कार्यक्रम दा प्रसारण करोग। कार्यक्रम दा विशे ऐ- “डिजिटल युग च हिंदी- नमियां संभावना, नमियां चुनौतियां”। इस विशेष प्रसारण च साढ़े परौहने होगंन Central University जम्मू च हिंदी विभाग दे प्रमुख डाक्टर

शशिकांत मिश्रा, जेहड़े इस विशे पर अपने माहिराना विचार सांझे करगंन। इस कार्यक्रम दी मेजबानी साठे एंकर विजय बजाज होर करगंन।

<><><><><><>

JK Weather

मौसम विभाग ने जम्मू-कश्मीर च कल तगर मौसम दे आमतौरा पर खुश्क रौहने ते कुसा-कुसा थाहर हल्की बून्दा-बून्दी होने दी पेशनगोई कीती ऐ। ऊआं 13 शा 16 सितम्बर दे बश्कार केंई थाहरें बडुलै ते दपैहरी हल्की बरखा पेई सकदी ऐ। एहदे मगरा 17 शा 20 सितम्बर तगर आमतौरा उप्पर मौसम खुश्क गै रौहग पर ऊआं कुसा-कुसा थाहर हौली बरखा बी पेई सकदी ऐ।

<><><><><><>

Health Department Poonch (Byte)

सेहत विभाग ने अज्ज पुंछ दे राजा सुखदेव सिंह जिला अस्पताल च प्राथमिक चिकित्सा दिवस दे मौके पर इक जागरुकता कार्यक्रम दा आयोजन कीता, जेहदे तैहत विद्यार्थियें ते लोकें गी आपात स्थिति दौरान समें-सिर मैडिकल मदद हासल करने बारे जानकारी दिती गेई। मैडिकल सुपरिटेण्डेंट डाक्टर शफीक होरें बुनियादी प्राथमिक चिकित्सा ज्ञान दे महत्व पर जोर दिंदे होई आखेआ जे फौरी कारवाई कन्नै जिंदुएं गी बचाया जाई सकदा ऐ ते पेशेवर दी मदद औने शा पैहले गै माठे हालातें गी रोकेआ जाई सकदा ऐ। उंनं हादसें, चोटां लगने, खून बगने, जलने ते होर दुए आपात हालात कन्नै निबड़ने लेई बुनियादी हीलें बारे जानकारी दिती। विद्यार्थियें, अस्पताल दे अमले ते आम लोकें इस पैहलकदमी दी सराहना कीती। डाक्टर शफीक होरें आखेआ जे इस चाल्ली दे कार्यक्रमें कन्नै एमरजेंसी सरबन्धी तैयारियें गी बेहतर बनाने ते सामुदायिक जागरुकता बधाने च मदद थ्होग। उंनं आखेआ.....(बाईट)

<><><><><><>